

醫斷斥醫斷目次

醫斷

司命	一	修治	六
死生	一	相畏相反	六
元氣	二	毒藥	六
脈候	二	藥能	七
腹候	三	藥產	七
臟腑	三	人參	七
經絡	三	古方	七
引經報使	三	名方	八
鍼灸	四	仲景書	八
榮衛	四	傷寒六經	八
陰陽	四	病因	九
五行	四	治法	九
運氣	五	禁宜	〇
理	五	量數	〇
醫意	五	產蓐	〇
瘤疾	五	初誕	一
素難	六	痘疹	一

攻補

一一

鍼灸之用一旦馳逐其病非無驗也(鍼灸)

一一二

虛實

一二

榮衛者氣血之別稱也(營衛)

一一三

斥醫斷

緒言

一五

陰陽者天地之氣也無取於醫矣(陰陽)

一一三

古人謂醫爲司命官者(司命)

一六

五行之說已見虞書及洪範(五行)

一一三

死生者命也自天作之(死生)

一六

五運六氣者無驗於病也(運氣)

一一四

死生者醫之所不與也(死生)

一七

世之好言理者(理)

一一四

世醫動輒預定其死生(死生)

一七

醫意之說一出而世之狡兒以爲口實(醫意)

一一五

元氣之說聖人之所不言六經莫有焉(元氣)

一八

世醫以痼疾名持病而難平治矣(痼疾)

一一五

若夫隨年齒而旺衰者天地之道萬物之

一八

素靈二書古人以爲先秦之僞作(素靈)

一一五

常也(元氣)

一九

本草妄說甚多不足以徵也(本草)

一一六

人心之不同如其面也脈亦然(脈候)

一九

後世修治之說甚煩(修治)

一一六

屬謂曰起人之爲方也(脈候)

二〇

相畏相反之說甚無謂也(相畏相反)

一一七

如留飲家脈千狀萬形或無或有不得而

二〇

藥者草木偏性者也(毒藥)

一一七

詳矣(脈候)

二〇

諸家本草所說藥能率多謬妄(藥能)

一一七

腹者有生之本故百病根於此焉(腹候)

二一

藥產有某土宜處某土不宜處(藥產)

一一八

周禮曰參之以九藏之動而不分腑也(臟腑)

二一

人參有數種今見清韓賈船所載來者皆

一一八

十二經十五絡者(經絡)

二二

非古也(人參)

一一九

本草曰某藥入某經某藏(引經報使)

二二

方者莫古於仲景而仲景爲傳方之人非

一一九

作方之人也(古方)

一一九

世俗所謂名方者(名方)·····	二九
仲景書甚詳悉焉然要略玉函僞撰已	
(仲景書)·····	三〇
傷寒論六經非病在六經也(傷寒六經)·····	三〇
後世以病因為治本也曰不知之焉得治	
(病因)·····	三一
治有四汗吐下和是也(治法)·····	三一
人性之好惡不同(禁宜)·····	三一
錄兩升斗古用甚密年世悠久不可得而	
悉也(量數)·····	三二
產蓐之法方士所習各殊(產蓐)·····	三三
初誕之法務去胎毒為主(初誕)·····	三四
痘疹之證古籍不概見東漢初始有之(痘疹)·····	三四
醫之於術也攻而已無有補矣(攻補)·····	三五
夫正權衡而後輕重可較也(虛實)·····	三五

醫斷

西肥 鶴冲元逸著

司命

古人謂醫爲司命官者。蓋本諸扁鵲之言。是不知道者耳。扁鵲之言曰。疾在骨髓。雖司命無奈之何。是謂雖司命而不謂己爲司命也。可以見已。夫死生有命也。命者天之令也。孔子之所罕言。諸子之所不得聞也。醫其如夫命何。蓋醫者掌疾病者也。謂之掌疾職則可矣。謂司命官則所以誣扁鵲惑來學者。莫斯爲甚矣。學者思諸。

死生

死生者命也。自天作之。其唯自天作之。醫焉能死生之哉。故仁不能延。勇不能奪。智不能測。醫不能救。唯因疾病致死非命也。毒藥所能治已。蓋死生者。醫之所不與也。疾病者。醫之所當治也。故先生曰。盡人事而待天命。苟人事之不盡。豈得委於命乎。是故術之不明。方之不中。而致死者非命矣。執古之方。體今之病。能合仲景之規矩而死者命也。質諸鬼神。吾無愧爾。世醫動輒預定其死生。彼其意謂斃於吾手。則害于名矣。間有一二中者。益信其臆不爽也。夫察聲氣色。臆其死生。周官所命也。豈不可乎。雖然。察之以臆。臆之以臆。使其生者輒編之鬼籍。起乎束手以待其斃。是豈仁人之用心乎。故既臆其死。猶且盡吾術。以望其或生。古之道也。然而不生。

然後可謂命也已矣。唯重其名。故唯視其死。不能忘死。生於執刀圭間。所以惑也。唯重其仁。故唯視其生。所以世醫所謂死者。間有起者也。故曰。死生者。醫之所不與也。

元氣

元氣之說。聖人之所不言。六經莫有焉。蓋自漢儒創也。下至唐宋大盛。遂爲醫之恆言。曰元氣虛。曰元氣衰。曰補元氣。夫元氣者。陰陽一元氣也。天之所賦。人之所生。所謂先天之氣也。是豈可虛衰者哉。亦豈可補乎哉。若夫隨年齒而旺衰者。天地之道。萬物之常也。非人力之所能挽回矣。如其當強壯而衰弱者。則有所抑遏也。除其所抑遏者。則自復其常矣。彼不辨之。妄以爲虛衰。而欲補之。可謂愚矣。又曰。行氣則病自除。蓋本之素問曰。百病生於氣。雖然。病之者毒也。毒乘之也。豈氣特病乎。又豈毒自除乎。說者不論及此。誤矣。

脈候

人心之不同。如其面也。脈亦然。古人以體肥瘦。性緩急等。爲之規則。然是說其大抵耳。豈得人人而同乎。醫謂人身之有脈。猶地之有經水也。知平生之脈。病脈稍可知也。而知其平生之脈者。十之一二耳。是以先生之教。先證而不先脈。先腹而不先證也。扁鵲曰。越人之爲方也。不待切脈望色。聽聲寫形。言病之所在。可以見已。且如留飲家脈。千狀萬形。或無或有。不可得而詳矣。夫脈之不足以證也如此。然謂五動或五十動。候五藏之氣。

者。妄甚矣。如其浮沉遲數滑瀉。僅可辨知耳。三指舉按之間。焉能辨所謂二十七脈者哉。世有隱其病。使醫診其脈以試之者。乃取其不知之似。拙以意推度。言其髣髴。欲以中之。自欺之甚矣。醫其思諸。

腹候

腹者有生之本。故百病根於此焉。是以診病必候其腹。外證次之。蓋有主腹狀焉者。有主外證焉者。因其所主。各殊治法。扁鵲曰。病應見於大表。仲景曰。隨證而治之。宜取古法而求其要矣。

臟腑

周禮曰。參之以九藏之動。而不分腑也。仲景未嘗論矣。無益於治病也。傷寒論中適有之。然非仲景之口氣。疑後世攙入也。夫漢以降。以五行配之。以相克推病。且曰。腎有二。曰。臟五而腑六。曰。臟六而腑五。曰。有命門。有心包。有三焦。其說弗啻堅白。要皆非治疾之用矣。

經絡

十二經十五絡者。言人身氣脈通行之道路。醫家之所重也。然無用乎治矣。是以不取也。如鍼灸法。無一不可灸之穴。無一不可刺之經。所謂所生是動。并榮俞經合等。亦妄說耳。不可從也。

引經報使

本草曰。某藥入某經某臟。又曰。某藥治某經病。某藥某經之藥也。某物某臟之劑也。其分別配合。歷歷乎如可據者。若其如此。雖失正鵠。然而不可

以此治病。則其爲牽強。可以知已。古法唯因上下表裏所主而處方不同焉耳。

鍼灸

鍼灸之用。一旦馳逐其病。非無驗也。唯除本斷根爲難而已。如癰毒。灸之則動。動而後攻之。易治。故鍼灸亦爲一具。而不必專用。亦不拘經絡分數。毒之所在。灸之刺之是已。

榮衛

榮衛者。氣血之別稱也。所謂榮行脈中。衛行脈外。行陽二十五度。行陰二十五度。亦理而已。非疾醫之用也。不可從矣。

陰陽

陰陽者。天地之氣也。無取於醫矣。如表裏爲陰陽。上下爲陰陽。猶可矣。至如朱丹溪陽有餘。張介賓陰有餘之說。穿鑿甚矣。後人執兩家之中。以爲得其所。所謂子莫之中耳。其他如六經陰陽。不可強爲之說。非唯無益於治。反以惑人。學者思諸。

五行

五行之說。已見虞書及洪範。下至漢儒。熾言之。素問難經。欲由是以總天下之衆理。窮人身之百病。說之若符契然。雖然。要皆論說之言已。今執其說。施之七術。則致謬千里。是吾黨所以不取也。後人增廣其說。以誇窮理。可謂無用之徒也已。

運氣

五運六氣者。無驗於病也。考司天在泉。推大過不及。定寒熱溫涼。按主病。試應脈者。無有其驗。可謂迂矣。要是陰陽家之言。奚取於疾病醫乎。

理

世之好言理者。必物推事窮。至其所不通。鑿以誣之。蓋理本非可惡者也。惡其鑿焉耳。故雖口能說百病之理。而難其治者。爲其鑿也。夫理無定準。疾有定證。豈可以無定準之理。臨有定證之疾哉。故吾黨論其已然者。不論未然者。又不論其所以然者。蓋事理相依不離者也。故事爲而得之。理默而識之。

醫意

醫意之說一出。而世之狡兒。以爲口實。曰。醫之道。唯意以推之。何必讀書受業。而後爲之邪。吁。妄哉。陋哉。豈可與言道哉。蓋醫之爲道。自有一定法。何鑿推妄行之爲。其如是也。不由規矩。以擬方圓。不用繩墨。而置曲直。豈得不差乎。學者思諸。

痼疾

世醫以痼疾名持病。而難乎治矣。至如中風。喘噎。脹滿。痿躄等。難之益甚。是無它。方不得法也。蓋方法不愆焉。則無病不愈也。今從法處方。其所難者。得治不少矣。彼已不能治。則雖千百人中起一人。不亦善乎。此非入門同道。不易論焉。

素難

素靈二書。古人以爲先秦之僞作。周南先生曰。六朝以降之書。然其中間有古語可法者。學者擇焉。難經傳以爲越人書也。而其言理最勝。故害道亦多。考之扁鵲傳。亦唯僞作而已。

本草

本草妄說甚多。不足以徵也。然至考藥功。豈可廢乎。宜擇其合於仲景法者用之。至如延齡長生。補元氣。美顏色。入水不渾。白日見星。殊不可信也。其非炎帝書也。不待辨而明矣。後世服食家說。攬入本經。不可不擇焉。

修治

後世修治之法甚煩。如煨炮炒。中黑微炒。酒浸酢浸。九蒸九曝等。與作飯作餅。爲羹爲臠之法何別乎。去酷烈之本味。偏性之毒氣。以爲鈍弱可狎之物。何能除毒治病哉。蓋毒卽能。能卽毒。製以益毒則可也。殺毒則不可矣。

相畏相反

相畏相反之說。甚無謂也。古人製方。全不拘于此。如甘草芫花。未見其害也。其他亦可以知已。

毒藥

藥者草木。偏性者也。偏性之氣。皆有毒。以此毒除彼毒耳。周禮曰。聚毒藥以供醫事。又曰。以五毒攻之。左傳曰。美疢弗如惡石。古語曰。盡藥苦口利。

於病內經曰。毒藥攻邪。古者以藥爲毒。可以知已。後世自道家之說。徧于疾醫。以藥爲補氣養生之物。不知其爲逐邪驅病之設也。可謂失其本矣。甚則至有延齡長年。還少不死等之說。庸愚信之。煅煉服食。以誤其身者多矣。悲夫。

藥能

諸家本草所說藥能。率多謬妄。故先生壹皆考信於仲景氏云。參觀其方。功用可推也。今舉本草所載。不合仲景者一二。如人參治心下痞。而彼以爲補氣。石膏已渴。而彼以爲解熱。附子逐水氣。而彼以爲溫寒。其相齟齬者。大抵爲爾。先生別撰藥徵以詳之。故不贅于此。

藥產

藥產有某土宜處。某土不宜處。其土之所生。性之所稟。不可不詳也。

人參

人參有數種。今觀清韓賈舶所載來者。皆非古也。蓋參本味苦。治心下痞。輒之物也。仲景之書。及千金外臺方中所用。可見已。自服食家之說行。有補元氣益精力之言。於是浸甘草汁。甘其味。加修飾。美外形。以街貴價也。人以爲救死之良藥。醫以爲保生之極品。承誤以傳。眩厲而失真矣。貧賤而死者。以爲不用參之尤。富貴而斃者。以爲參不及救之。唯遁辭於彼而已。且今用之。心下痞。輒不治。和參能治之。是其由製造。可以知也。

古方

方者莫古於仲景。而仲景爲傳方之人。非作方之人也。蓋身爲長沙太守。博集羣方。施之當時。以傳後世。而其書具存焉。故欲用古方者。先讀其書。方用可知。然後藥能可知也。未知方用。焉能知藥能乎。雖然。未知藥能。則方用亦不可知也。况方意不可解者甚多矣。蓋雖仲景。亦或有不解者。雖則或有不解者。而昔人所傳。既用有驗者。又奚容疑焉。降至千金外臺書。方劑不古者居多。其可取者。不過數方而已。概多味者可疑矣。世有欲以數藥兼治數證者。自謂無不中也。亦唯暗投瞑行也。已。學者思諸。

名方

世俗所謂名方者。間有奇効。故醫傳之。非醫者亦傳之。不審其所出。而一時施用有驗者。相傳以爲名方也。蓋載書籍者。未必佳。傳俗間者。未必不佳。宜博求普問。以輔其術矣。

仲景書

仲景書。有傷寒雜病論。金匱要略。玉函經。其論傷寒及雜病。甚詳悉焉。然如要略玉函。僞撰已。先生辨之。故不贅也。雖傷寒雜病論。獨出于仲景。然叔和撰次之。加以己說。方劑亦雜出。失本色者。往往有之。且世遠時移。謬誤錯亂。非復叔和之舊。不可不擇也。後之註家。皆爲牽強附會。不可從也。故先生之教。其理鑿者。其說迂者。一切不取之。所以求其本色也。學者宜審焉。

傷寒六經

傷寒論六經非謂病在大經也。假以爲紀也已。及其施治也。皆從證而不拘焉。如後世謂某證在某經。某經傳某經。及誤下越經傳之說。皆非矣。不可從也。

病因

後世以病因爲治本也。曰。不知之。焉得治。予嘗學其道。恍惚不可分。雖聖人難知之已。然非謂無之也。言知之。皆想像也。以想像爲治本。吾斯之未能信矣。故先生以見證爲治本。不拘因也。即仲景之法也。今舉一二而徵焉。中風。頭痛。發熱。汗出者。下利後。頭痛發熱。汗出者。皆桂枝湯主之。傷寒寒熱往來。胸脇苦滿。中風寒熱往來。胸脇苦滿。或痞。或腹痛。或熱入血室。有前證。則皆小柴胡湯主之。傷寒大煩渴。中熱大煩渴。皆白虎湯主之。是雖異其因而方則同矣。可見仲景從證不拘因也。若不得止論之。則有二矣。飲食外邪是也。雖然。入口者。不出飲食。蓋留滯則爲毒。百病繫焉。諸證出焉。在心下爲痞。在腹爲脹。在胸爲冒。在頭爲痛。在目爲翳。在耳爲聾。在背爲拘急。在腰爲痠。在脛爲強直。在足爲脚氣。千變萬怪。不可名狀矣。邪雖自外來。其無毒者不入。假如天行疫氣。間有不病者。天非私人。非不居氣中。是無毒也。然則一也。故仲景隨毒所在而處方。由是觀之。雖曰無因。亦可。是以吾黨不言因。恐眩因失治矣。後世論因。其言多端。不勝煩雜。徒以惑人。不可從焉。

治法

治有四。汗吐下和是也。其爲法也。隨毒所在。各異處方。用之。瞑眩。其毒從去。是仲景之爲也。如其論中所載。初服微煩。復服汗出。如冒狀。及如醉狀。得吐如蟲行皮中。或血如豚肝。尿如皂汁。吐瀉瀉出之類。是皆得其肯綮。然焉者也。尙書曰。若藥弗瞑眩。厥疾弗瘳。可觀仲景之術。三代遺法也。今履其轍而嘗試之。果無有不然焉者也。於是乎。吾知其不欺我矣。然而世人畏瞑眩如斧鉞。保疾病如子孫。吁。其何疾之除哉。甚矣其惑之也。

禁宜

人性之所好惡不同。稱口腹者爲宜。不稱者爲不宜。古者養精以穀。肉果菜。未嘗言禁宜也。後世嚴立禁宜。曰。某物增病。某物勝藥也。然其爲物所奪者。非藥也。何以勝彼病之爲哉。立禁宜之弊。至進其所惡。禁其所好。不亦左乎。

量數

錄兩升斗。古昔所用。甚密矣。雖然。年世悠久。不可得而審也。如其概則可推知已。先生乃有所考略。此後世彼方。一貼之重大。率不下數兩。今見華客來長崎者所用。亦然。此方有以一錢爲一貼之說。輕重僅出入此耳。夫以殺性之藥。作如此小劑。且其煎煮之法。不一而足。再煮其滓服之。何其治疾勝毒乎。是故先生之教。專守方書。輕重必較。多少必量。如其再煮。則古所無也。故不爲矣。

產毒

產蓐之法。方士所習各殊。其有害者除之。無害者從之。勿爲收生家法所拘束焉。恐反生它病已。蓋產後困倦。欲眠且臥。而今京師俗。數日戒之。甚不可。若血暈。欲以參芪之劑防之。妄矣。宜審證治之。又妊娠腹帶之法。中華古無之。本邦有之者。世謂神功皇后征韓。妊娠擗甲。故用之。非常法也。

初誕

初誕之法。務去胎毒爲主。且不早與乳可也。二三日爲度。若早與之。其毒難去。如朱蜜茯苓五香等。何毒之逐不用而可。至其有病者。莫令綿延。須急攻之。今人動輒謂人之稟性。古今自有厚薄。今也薄矣。故不勝攻擊也。宜補之。惡是何言哉。夫人者與天地參焉。天不裂地不壞。何唯人之異哉。雖草木亦然。以今之藥。攻今之疾。何畏怖之有。

痘疹

痘疹之證。古籍不概見焉。東漢初始有之。本邦則聖武帝時云。蓋天地人物。無古今一也。豈古有之者。無于今。今有之者。無于古哉。意者自古有之。不傳其名已。其爲病也。始與癰瘍無異矣。治法亦以除毒排膿爲主。如補瀉二法。則不知者之所立耳。蓋見毒酷而死者也。未見毒盡而斃者也。其斃者。是酷毒壅塞之所致也。醫其詳諸。

攻補

醫之於術也。攻而已。無有補矣。藥者一乎攻焉者也。攻擊疾病已。內經曰。攻病以毒藥。此古之法也。故曰攻而已。精氣者。人之所以生也。可養以持。

焉。養持之者。穀肉果菜耳。內經曰。養精以穀肉果菜。不曰之補而曰養。古之言也。蓋雖穀肉果菜乎。猶且難補之。而况藥乎。豈人力之所能也哉。故曰無有補矣。後世並論攻補。岐藥二之。專爲補氣之說。曰病輕則攻之。重則補元氣。若強攻之。元氣竭死。夫藥者一平攻焉。豈得能補之哉。元氣果可補。則人焉死。妄誕特甚矣。

虛實

夫正權衡而後。輕重可較也。審平常而後。虛實可論也。蓋人自有常焉。失常然後有虛實矣。於精氣謂之虛。於邪氣謂之實。何以言之。內經曰。邪氣盛則實。精氣奪則虛。夫精氣者。人之不可無焉者也。唯懼其虛。故言之虛。又言之奪。邪氣者。人之不可有焉者也。唯懼其實。故言之實。又言之盛。是故虛以養言。實以攻言。攻之者毒藥。養之者穀肉。此古之法也。故虛實皆可由平常而論焉。有人於此。體甚羸弱。所患最多。問曰。僕免身至今。如此其患。衆醫咸曰。如爾此天質之虛症也。病不可治矣。若欲強治之。其斃也必矣。不若補以全生也。乃以藥代飲食。無一日廢之。雖然。尙仍舊。子之所見亦如之乎。願聞其說。曰。豈其然乎。以余觀之。子之所患。是乃實也。其人謬然曰。子何言之妄。瘦瘠如此。加之病。人咸爲虛症。何謂之實也。曰。吁。何此之謂哉。夫虛實者。失常之名也。於邪氣謂之實。於精氣謂之虛。子已有病。何命以虛乎。又豈得謂之天質乎哉。是當其胚胎之初。受疾而生。精氣爲其所抑壓。而不能充暢者耳。內經曰。邪之所棲。其氣必虛。是也。然則

審其術以攻擊之。飲食隨其嗜欲。則病去而精氣自充暢矣。夫然後肥瘠強弱。是其性已。於此乎可謂天質而已矣。彼不由平常。而論虛實也。紛紛乎不知所適從矣。故目不見其病。唯羸弱是視。途名以虛症。不亦謬乎。是不正權衡而較輕重者也。且夫所欲補之者。非藥乎。藥者偏性之毒物耳。是以雖能拔邪氣。而不能補精氣也。若唯精氣之虛。蓋以穀肉養之。彼既欲補不能也。竟使人不免瘁爾懷疴。以終其身也。悲夫。要之坐不辨其爲失常之名焉耳矣。又如謂氣虛腎虛脾胃虛之類。亦率準之。皆不因疾命名。愆之所創焉。

刻斥醫斷凡例

一是非者天下之公也。此篇所述。即吾儕二三子。舉醫斷之說。以質之先生。先生發蒙解惑。徵諸聖言。而是是非非。一歸于公。而止。乃書以授弟子。非敢與人爭衡。亦出于授業施教之不得已也。

一此書初脫稿。徒弟之外。不許輕示人。但恐謄寫致謬。或失微旨。故固請先生。上諸桑梓。以與同志傳之。論辯簡易。不用縟采。辭達而已。非敢告大方君子也。

一全篇凡四十三章。將醫斷逐段附入。彼則低寫于前。此則高寫于後。且欲省煩。故抄彼文緊處。而不舉其全。覽者詳焉。

一此刻有病機診候。未盡其歸趣者。蓋所以不涉駁義。則不論及也。
一本書可非者。不在此限。然不與大義者。乃所不論也。
一各條不揭題辭。以讀其論而義自見也。且就簡云。

門人和州足高恭謹識

斥醫斷

法眼平安烟惟和柳安甫著

緒言

余讀鶴氏所編吉益子醫斷。廢書而歎。可爲太息者三。可爲流涕者二。其一。背理而傷道者。難偏舉矣。夫醫雖小道。其精理妙用。非聖人不能肇修之也。是以古今醫流。雖有卓識俊才。迥出于人者。然其論辨取舍。一皆折衷於經。而終不能更其轍也。人命所係。至重綦大。豈可不慎哉。而彼書也。斷然橫醫經。弃陰陽。變古今不移之道。而異其端矣。嗚呼。此言之行也。後將不勝其弊矣。可爲歎息者一也。雖以仲景明敏。猶質信於素問。陰陽大論。彼書雖稱取方於仲景。然取舍任意。加以妄說。謂人參無補。而治心下痞。硬。附子非溫。而逐水氣。然則仲景何不舍人參用枳實。代附子以甘遂乎。可謂無稽之言矣。可爲歎息者二也。夫政有王霸之別。吏有循酷之異。醫道亦然。彼書論術甚率易。分證尤忽略。不求標本。不究病因。有攻而無補矣。譬猶李斯商鞅之術。郅都杜周之治。如此而不敗者。幾希也。可大息者三也。雖死生有命。醫事所關亦大矣。原治術之得法以回生。與失宜以速死。則可以知之矣。吉益子謂死生者。醫所不與也。此言之弊。終令庸愚者。視人死如風花。吁。民病將疇依。可爲流涕者四也。其最勝悲者。初誕嬰兒。不辨稟賦渥薄。一切攻擊之施。古今經法。置而不論。臆斷所是。無少顧

疑至痘疹之治。慘刻益酷。可不謂忍乎。可爲流涕者五也。此五者。誠足以爲天下後世之患。夫俗樂悅耳。詭辨驚聽。彼人之論。亦取快一時。而其實有不測之禍。不可不辨也。作斥醫斷。

古人謂醫爲司命官者。蓋本諸扁鵲之言。是不知道者耳。至誣扁鵲惑來學者。莫斯爲甚矣。

司命出周禮。星名也。扁鵲引而論之。思邈借以名醫。猶管子以穀米爲民之司命。孫子曰。將者人之司命。可以徵也。聖人制醫藥。以濟民夭死。則借司命以名醫。亦何不可之有哉。誣扁鵲惑來學者爲誰也。可謂離蹤而歧轍者也。

死生者命也。自天作之。至醫焉能死生之哉。

死生有命。出子夏之言。顏子而夭。盜跖而壽。貴不能奪。賤不得讓。數盈運盡。無奈之何。此夫人所知。何煩說之爲。然亦有不幸者。有自取者。王仲任所謂強弱壽夭之命。所當觸值之命。及正命。遭命。隨命等之說。議論多端。終難得其要領。此卽聖人所罕言也。而況非聖者乎。蓋煩說之必惑人。輕言之則傷物。言之有弊。先賢慎焉。夫惟忠臣烈士。舍生而取仁。犯難而蹈義者。臨時自斷曰。死生命也。則可已。其他或爲慾伐性。因忿忘身者。至其不可奈何。乃亦曰。命也。此豈命哉。乃自求也。然亦自傷而止。無害乎人矣。惟刑官與醫者。決不可言命也。言必有害乎物焉。何則。醫與刑官。皆與生殺之事者也。平反則多活。失入則多冤。診應病而起。方失法而斃。片紙具

案一匙藥劑殺無辜而折多壽莫斯可畏以生殺爲重任畏之慎之猶恐得罪於造化而況一託之於命而謂己不與焉乎此非所宜言也又敢唱以導人乎若其說之行也庸醫凡工不論己術之粗妄人死則曰病吾除之死生命也醫不與焉黠者藉以爲口實愚者信以爲實然競爲酸醢無復忌憚其禍豈可勝言也哉出言不善弊至於此凡爲醫者所宜深察者也

死生者醫之所不與也至執古之方體今之病能合仲景之規矩而死者命也質諸鬼神吾無愧爾

天地大德曰生聖人爲醫藥濟民天死書稱天工人其代之周禮載凡民之有疾病者分而治之死終則各書其所以而入于醫師歲終則稽其醫事以制其食祿先王所以慎死生者至矣盡矣死生而醫不與則何爲書死終以制食祿乎嗚呼契然無心于死生者非醫矣是以良工知幾微而治腠理故使良醫得蚤從事則疾可已也身可活也及其入膏肓也雖神醫無奈之何吉益子言死生者醫之所不與者蓋本諸扁鵲之言也然亦不知本者已扁鵲之言曰越人非能生死人也此自當生者越人能使之起耳此以未入骨髓者與既在膏肓者言之矣若使齊桓蚤從扁鵲之言則病可已也身可活也有病不治而死不可謂命也號太子待扁鵲而蘇可以見也故使良醫蚤從事則病者或以愈且死或以生然世醫專以死生爲己任者疑乎仁其失愚也言死生醫不與者疑乎知其失賊也愚與

賊君子不由焉。醫當以可治爲可治。以不可治爲不可治。何必言命耶。治人病不愈。而皆謂之命也。豈理哉。假令仲景當之。我不信焉。況不爲仲景者乎。況不合仲景之規矩者乎。須徵諸聖人之言。而後言命也。不揣其本而齊其末。方寸之木。可使高於岑樓。此之謂也。

世醫動輒預定其死生。彼其意謂斃於吾手。則害于名矣。至死生醫之所不與也。

知人死生。決嫌疑。定可治。醫之能事也。古之道也。工拙之所以分也。何尤世醫之爲哉。彼既謂其死。猶且盡我術。以望其或生。然而不生。然後可謂命也已矣。嗚呼。視不可治而欲治之。愚也。古人不爲之。非爲害于名。治之無益也。是扁鵲所以視桓侯之不可藥而逃去也。其言忘死生於執刀圭之間。辟諸操舟者。言忘覆沒於檣棹之間。豈可哉。

元氣之說。聖人之所不言。六經莫有焉。至是豈可虛衰者哉。亦可補乎哉。

元氣之說。雖不具於大經。其義則備焉。吉子以名求之而不得。輒謂大經莫有。聖人之所不言。可不謂昧乎物乎。夫元者萬物之初。是以易之教。以元爲大。曰。大哉乾元。萬物資始。至哉坤元。萬物資生。乃天地之大德。所以生生不已者。非氣而何也。繫辭曰。精氣爲物。祭義曰。氣也者神之盛也。在天爲元。在人爲仁。在人身爲體之長矣。孔子曰。元者善之長也。天非元無以運化乎萬物。君非元無以運化乎天下。人身非元無以運化乎四肢百

駭也。夫元原于天，行于人，通于萬物，呼爲統名。此亦不外於天地自然者也。彼曰：是豈可虛衰者哉？亦豈可補乎哉？非也。此氣衰，則化育失時，災害並至。君不君，臣不臣，于戈爭起。天地四塞，禮記曰：氣衰則生物不遂，衰氣不可不益。易曰：損而不已，必益。故受之以益。書曰：燮理陰陽，寅亮天地，可見此元氣或時虛衰，亦可以益之。后以裁成天地之道，輔相天地之宜，天地之氣且可益，況於人身哉？孟軻曰：氣體之充也，苟得其養，無物不長。夫名定而實辨，言正而義行，彼姦繆於道而誘其所好也。苟卿以爲亂正名，使民疑惑，則謂之大義，豈可不慎哉？

若夫隨年齒而旺衰者，天地之道，萬物之常也。至說者不論及此，誤矣。隨年齒而形與神旺衰者，素問論之詳矣。夫元氣之在全軀也，徹上徹下，無所不至。此氣也，分之則爲陽，爲陰，爲精神，生氣通天論曰：其氣三，是也。有所抑遏而不流，則爲病。所謂壯者氣行則已，怯者則著而爲病。此非真氣之衰也。氣不流，有似乎衰耳。所以不用補氣之藥，反施耗氣之劑也。內經所論，陳言戴人所說，亦不可不知焉。豈說者不論及此乎？彼適不思諸已。

人心之不同，如其面也。脈亦然。至先證而不先脈，先腹而不先證也。古人以四診病，自望始焉。蓋診外及內也。彼盤經旨，反古法，誰入不由戶，其以人心之不同，比脈之有異，可謂非類矣。若夫堯桀之心，霄壤不啻也。然其臂不爲桀短，不爲堯長，則脈亦豈天淵乎？故曰：以心比脈，可謂非類。

矣。

扁鵲曰：越人之爲方也，不待切脈望色聽聲寫形，言病之所在，可以見已。

扁鵲欲奇己術，故張言以夸中庶子，其不待切脈望色聽聲寫形者，此夸張之言耳。及其入診太子，則曰陽脈下遂，陰脈上爭，此切脈也。上有絕陽之絡，下有破陰之紐，破陰絕陽之色已廢，此望色也。及其聞耳鳴而鼻張，循其兩股以至於陰，則聽聲與寫形之診，可謂詳且明矣。鵲氏之子，不能讀書，漫引夸張之言，以爲之證，可謂認影響失其實者已。

如留飲家脈，千狀萬形，或無或有，不得而詳矣。夫脈之不足以證也如此，至自欺之甚矣。醫其思緒。

留飲之脈，或伏或見，如結如散，不可以名狀者，此所以爲留飲之脈也。病怪則脈亦怪，如沙脈邪祟，有此病則有此脈。怪病亦有屬飲者，皆脈道窒礙所致已。醫眩此而言脈不足以證者，可謂執一廢百矣。五十動代脈之說，靈樞人十一難論之，仲景亦謂動數不滿五十，短期未知，夫代者止歇不還之脈，陽氣竭盡而氣脈不接續也。至或如雀啄，或如屋漏，或如弦絕者，與死爲隣也。仲景曰：得此脈者必難治。所謂予之短期也。進退動數以見緩急輕重之候，豈可謂無此理乎？其他如傷寒心悸脈代者，腹痛結瘕止代者，妊婦惡阻脈代及結促者，阻滯去則脈復平，不可一途而論之也。至匿其病情，令醫診之，以驗其工拙，則蘇東坡有論闢之，慎疾者不可以

不知焉。

腹者有生之本。故百病根於此焉。至宜取古法而求其要矣。

視疾之法。背腹手足上下。無所不診焉。如仲景所謂結習病正在心下。按之則痛。但滿而不痛者。此爲痞。及按之濡。按之石硬。按腹之法。蓋爲審也。其寒熱虛實。腎間丹田。若夫裏結硬糞。可探而知焉。則可以知病之狀也。豈啻腹已哉。如扁鵲循其兩股以至於陰。可觀大表之間。無所不診也。

周禮曰。參之以九藏之動。而不分腑也。仲景未嘗論矣。無益於治也。至其說弗啻堅白。要皆非治疾之用也。

甚矣哉。吉益氏之解醫也。以周禮不分藏府。非醫書之言。周禮之書。非爲治疾而設。其言何一一盡醫理乎。彼既不能以周禮治疾。而以醫書治病。則醫之言不可以不取則焉。如吉氏謂藏府。陰陽。腎命門。心包三焦之說。無益於治而不取。辟猶以眉髮爲無益於身而去之。眉髮在身。身未必肥。眉髮去。身身未必瘦。而不去之者。以具體不可缺也。古人垂法正名。豈但眉髮之於身乎。且仲景曰。清邪中於上焦。濁邪中於下焦。又曰。屬藏者攻之。不令發汗。屬府者。不令洩數。洩數則大便輒。是等語皆緊要。其他內經所論。難經所辨。暨千金。外臺。類於法。品於治。豈無益於治乎。而言仲景未嘗論。固莽殊甚。

十二經十五絡者。至亦妄說耳。不可從也。

扁鵲曰。中經維絡。別下於三焦膀胱。又曰。絕陽之絡。破陰之紐。此以經絡

視病也。夫經絡於人身也。譬諸枰之有局。今以經絡爲妄。不取猶對無對枰。假令弈秋爲之。終不能善之也。史曰。必有經紀。拙工有一不習。文理陰陽失矣。此之謂也。

本草曰。某藥入某經。某藏。至其爲牽強。可以知已。古法唯因上下表裏所主。而處方不同焉耳。

醫之用藥也。猶將之用兵歟。疆弱安危之效。死生起死之機。不可輕也。夫兵有正有奇。馬步擇地。弓刀異便。多算勝。少算不勝。豈唯兵爲然哉。仲景之論醫也。方法有經。逆順異治。機變不可窮也。豈惟上下表裏。足以盡古法乎。如張元素引經報使之說。雖古無此說。然仲景之方。亦皆以桂枝麻黃發太陽。葛根解陽明。柴胡和少陽。及理中之理。中焦白虎。十棗承氣。抵當。均入胃。而藥氣之所趨。如鼓進金退。左摩右指。運諸掌上。則有此甚於彼者。至哉斯術也。莫不以合法爲本。趣變爲用。苟反於法。則安者危。不知變。則存者亡。稽其聚散離合之際。不可謂無入經入藏之理矣。

鍼灸之用。一旦馳逐其病。非無驗也。至不必專用。亦不拘經絡分數。毒之所在。灸之刺之是也。

鍼灸之有經紀。內經之法古也。扁鵲刺三陽五會。仲景刺期門於太陽之經。及橫。其它尸厥刺巨厥。期門。太陽少陽併病。刺大椎及肝俞。太陽病刺風池。風府。且灸少陰。灸厥陰。不一而足。後世不敢易紀律。而精術妙手。出於其間者。不鮮矣。今滅法立違。而實經絡分數於度外。嗚呼。弓矢不調。則

昇不能以中微六馬不和。則造父不能以致遠。此之謂也。

榮衛者。氣血之別稱也。至非疾醫之用也。不可從也。

榮衛者。水穀精悍之氣也。不可直指爲氣血之別稱也。蓋運行一身經脈之中外。如經營衛護然也。爪之生。髮之長。營衛之行。無少間斷。均是氣血也。運行者曰榮衛。盈滿者曰氣血。猶水之與流也。如謂流是水之別稱。豈理也哉。故仲景之書。有並稱榮衛氣血者。可以徵焉也。或榮衛和則愈。或榮衛彊弱。榮衛不能相將。三焦無所仰等語。皆切於治者也。彼言非醫之用也。不思諸甚矣夫。

陰陽者。天地之氣也。無取於醫矣。至非唯無益於治。反以惑人。學者思諸。

夫天者氣而不質。地者質而不氣。人則氣質合焉。氣陽也。質陰也。此人身陰陽顯然者也。彼吉益子者。體不具陰陽。則已然。彼既謂今天地卽古天地。人物亦然。如果不具陰陽。則人物亦非古之人物也。何言之相矛盾乎。陰陽之於醫事。古人規則莫外於此。豈可悖焉哉。扁鵲謂以陽入陰。所以治號太子也。仲景曰。陽不足。陰不足。陽結。陰結。陰陽會通。陽去入陰。所以治本陰陽也。若或置陰陽而不論。偶一得功。亦是謾遇已。何足尙也。夫朱丹溪張介賓之論。所見各偏矣。所以名不正而言不順也已。

五行之說。已見虞書及洪範。至吾黨所以不取也。後人增廣其說。以誇窮理。可謂無用之徒也已。

醫書以五行配五藏以辨其用與其位其來也尙矣。猶周禮官府之六屬以天地四時配之五行氣也。故曰行人亦稟天地之氣以生。故以氣配之。仲景曰夫天布五行以運萬類人稟五常以有五藏五者並行而不相悖者亦唯醫之教爲爾。如周禮食醫春多酸夏多苦秋多辛冬多鹹調以滑甘是以五味配之也。又大卜所謂各以其方之色與其體辨之亦可以徵也。五行出尙書配當之義見易高明配天搏厚配地此亦可併思也。若夫拘束地上五物及生剋勝復之理者不足與言治矣。

五運六氣者無驗於病也。考司天在泉至要是陰陽家之言奚取疾病醫乎。

運氣司天在泉之說無益於治療而有誤乎來學。疾病之嬰人身豈可推司運而預期哉。况又非內經之原文乎。齊褚彥通明王安道繆希雍既辯之可謂英斷也。然如周禮疾醫春時有清首疾夏時有痺疥疾秋時有瘧寒疾冬時有嗽上氣疾及內經陰陽應象論等說醫所當知也。

世之好言理者必物推事窮至其所不通鑿以詭蓋理本非可惡者也。惡其鑿焉耳。至蓋事理相依不離者也。故事爲而得之理默而識之。

孟子曰所惡於智者爲其鑿也。如智者若禹之行水也則無惡於智矣。禹之行水也行其所無事也。如智者亦行其所無事則智亦大矣。醫之爲術亦如此也。惟理無形以順爲形禹之行水亦唯順是行。今棄理而臨疾又言不論其所以然者所謂盲人騎瞎馬半夜臨深池吁危焉哉。

醫意之說一出。而世之狡兒。以爲口實。至豈得不差乎。學者思諸。
夫醫之術也。出於法而入於意。得于手而應于心。故其精微之極。有不可
以言者也。苟意之不周。惡能至精微乎。易曰。精義入神。以致用也。利用安
身。以崇德也。惟舊典可博涉。機變則不可預論。思之不置。神將通也。居今
之世。爲古之工。唯意與法已。醫而不用意。奚知其可。仲景曰。伏氣之病。以
意候之。此於四診之外。更示人以意候之法也。醫意之說。其來也有據矣。
夫。

世醫以痼疾名持病。而難乎治矣。至如中風。嘔噎。脹滿。痿躄等。難之益
甚。方不得法也。止此非入門同道。不易論焉。

醫之治痼病也。瞑眩攻擊。或可除之。然猶眎其元氣如何。况其痼之久也。
雖良醫不能拔而去之。而彼庸醫者。欲必除之。盡力以攻之。病未去而人
斃。中風。嘔噎。脹滿。痿躄之病。未入膏肓者。何治而不愈之有。其已入骨髓
者。雖盧扁亦不能治焉。其方法與治術。可學而知。可思而得。余亦有病論
治驗。見所著醫叢。不贅於茲。

素靈二書。古人以爲先秦之僞作。至難經傳。以爲越人書也。而其言理
最勝。故害道亦多。考之扁鵲傳。亦唯僞作而已。

內經之爲書。不知出于何人之手。亦無古文可以徵焉。祇古人質樸。編述
多不書姓字。如尙書。論語。國策等。不命其所編。後來無復識別。內經之書。
劉向。程頤。宋濂。以爲戰國之文。不過以其地名官稱言之耳。蓋上世作醫

藥以救天死其術與法人以傳人後恐失其傳書以傳焉家異法人殊書故漢書有黃帝白氏扁鵲內外經今之存者黃帝內經已其白氏扁鵲及外經者不可見不亦遺憾乎而於今可見古義者獨賴此書之存雖秦和越人倉公張機亦無能踰其矩度學者豈可不思哉彼既非內經又言有可法不免首鼠兩端八十一難以扁鵲傳不載之爲僞作何考之疎乎秦漢以降天下言脈者無不皆賴此書故扁鵲傳曰至今天下言脈者由扁鵲也彼亦兩手診脈按腹斷病則居此書之術中而不自知可謂徙宅忘妻矣難經訣診於寸口候氣於腎間也其度越前古獨步後來者炤炤乎誰出其範圍乎而彼言害道且非扁鵲書夫誣扁鵲惑來學者莫斯爲甚矣

本草妄說甚多不足以徵也至後世服食家說攙入本經不可不擇焉諸家本草博采衆說旁及道家方士之言而尤雜無統也醫當擇之明白的實不眩邪說自試有效瞭然自得而後用以治疾也古云工欲善其事必先利其器苟器不利而事善者未之有也屠屠神仙延年虛妄之說者豈可與論醫焉哉修德氏已辨之余亦稽古徵今撰本草筌欲以告同志後世修治之說甚煩至蓋毒即能即毒制以益毒則可殺毒則不可矣

仲景之法有咬咀者各別擣者曰中杵之者且鉛丹香豉出于制造麻沸甘爛異於煮法均皆修治也豈可厭煩乎雖本草家之法多難遵用然砒

石制以益毒。膠皮制不減能。况炮炙洗燒。各適其可。則亦似乎未可全攷斥之也。學者思諸。

相畏相反之說。甚無謂也。至其它亦可以知已。

古人制方也。妙義精術。試諸千載之下。見奇奏効。應驗合職。蓋品味和調。則桴鼓影響不啻也。若夫處劑失法。則非徒藥不靈。過端已萌於此。凡物之決然畏滅者。蟹膏消漆。枳椇化酒。鈴羊能碎金剛。胡桃亦割鐵錢。豈祇是已哉。磁石引鐵。琥珀拾芥。及彩也。染也。飪也。得法而出色。失和則損味。其餘相畏相反相宜不可勝數也。譬如賢佞不相容。寬猛難並行。何曰甚無謂也。

藥者草木偏性者也。偏性之氣皆有毒。以此毒除彼毒耳。至煉煅服食。以誤其身者多矣。悲夫。

以毒除毒。猶以兵攻兵耶。然兵有攻有守。或奇或正。及虛及實。避銳氣。擊惰歸。知節勢。審動靜。途有所不由。軍有所不擊。全國爲上。破國次之。百戰百勝。非善之善者也。唯醫亦然。虛虛實實。緩急成敗。唯法是依。唯機是察。治法必以除毒一法。非善之善者也。

諸家本草所說。藥能率多謬妄。至今舉本草所載不合仲景者一二。如人參治心下痞。而彼以爲補氣。石膏已渴。而彼以爲解熱。附子逐水。氣。而彼以爲溫寒。其相齟齬者。大抵爲爾。

甚矣哉。古益子之好奇也。君子一言以爲知。一言以爲不知。何其言之疎。

且妄也。仲景未嘗言人參非補。治痞嘔。附子非溫。逐水氣。可謂誣也。今舉其一二以證之。傷寒論太陰篇曰。自利不渴者。屬太陰。以其藏有寒故也。當溫之。宜服四逆輩。又少陰病。脈沉者。急溫之。宜四逆湯。又發汗病不解。反惡寒者。虛故也。芍藥甘草附子湯主之。又曰。附子溫經。及下利清穀裏寒者。四逆湯主之。如是則附子非溫而何也。其甘草附子湯。桂枝加附子湯。真武湯等方中。有附子而利水氣者。乃溫中運走之餘力耳。非本分之能也。如代赭石湯。瀉心湯之屬。治心下痞。亦猶是已。非人參之能。而黃連代赭重墜苦寒之力也。如桂枝人參湯治痞。則爲表裏不解。數下之而裏氣大虛而設也。痞不待治而治者。乃人參補正之餘功已。且通脈四逆湯下云。利止脈不出者。加人參一兩。發汗後身疼痛。脈沉遲者。人參新加湯主之。霍亂篇曰。惡寒脈微而復利。四逆加人參湯主之。霍亂寒多不用水者。理中湯主之。臍下悸者。用人參。長沙氏以人參爲補。昭昭乎不僞辯也。石膏治渴。以解熱也。熱之不解。惡能已渴。如厥陰篇云。傷寒脈滑而厥者。裏有熱也。與白虎湯。三陽合病。自汗出者。白虎湯主之。此條不曰渴也。其它治渴者。有五苓柴胡猪苓承氣等法。豈石膏而已哉。鹵莽滅裂。不顧紕漏。遂爾排擊世醫。建立門戶。自是而非人。如此者。豈能合仲景之規矩耶。可謂扁鵲掛軒笑人之倒行已。

藥產有某土宜處。某土不宜處。某土之所生。性之所稟。不可不詳也。橘踰淮爲枳。雞舌不產倭華。及韓參之甲天下也。實土宜之異產。地方之

界物哉。醫不可不辨識也。彼已言詳其土宜。而舍韓參爲非。用倭參爲能。前言而後反。嗟蜂也。口甚甘。尾乃毒。學者勿愛其甘而受其螫。

人參有數種。今見清韓賈舶所載來者。皆非古也。至今用之。心下痞輒不治。和參能治之。是其由製造。可以知也。

人參之品類雖多。而以朝鮮產爲上方。今此邦。治化隆盛。四方交易。無物不到焉。往年朝鮮貢人參實。官園種之。於是此邦有韓參實。濟民之仁澤也哉。余嘗得其實而種之。花實根形。與本草說相符。取此證彼。則韓舶所載來者。眞贋可辨。製造可分。何容賈賢欺乎。蓋人參功力。豈徒止治心下痞輒哉。此物大力破堅積。治痞輒。亦唯補正運化之餘力已。不然則漢以降醫方之言。豈無驗而言之乎。彼獨造不經之說。於千載之下。譏誣古人。竊弄來學。此坐於不知土宜。與淺人參是也。

方者莫古於仲景。而仲景爲傳方之人。非作方之人也。至亦唯暗投暝行也已。學者思諸。

仲景之論法設方。明白精正。千載一人。於斯爲盛。以至後世肘後。千金。外臺等。傳方之書。所祖述。所取則也。而仲景以前。無方之可見。無論之可證也。故褚澄曰。漢以前。有說無方。漢已後。有方無說。而彼以爲傳方之人。非作方之人也。且言雖仲景亦或有不解者。此有何所見。何所徵。而言之邪。肆口之甚。一至于此也。可謂妄矣夫。

世俗所謂名方者。間有奇効。故醫傳之。非醫者亦傳之。至宜博求普問。

以輔其術矣。

本邦醫俗傳稱名方者蓋本邦上世之遺方歟抑俗間驗而傳之也未可知焉。間有奇効者醫當求以輔其術非無裨補也。宋御局所輯者亦如是已。彼若知之則何取方仲景之一書悉舍後世方而不取反俗方是問之爲哉可謂貂不足狗尾續已。

仲景書有傷寒雜病論金匱要略玉函經共論傷寒及雜病甚詳悉焉然要略玉函僞撰已至其理鑿者其說迂者一切不取之所以求其本色也。

傷寒雜病論仲景手錄書已亡矣今之存者晉王叔和所詮次非復長沙之舊也。稱金匱玉函者按文獻通考至於宋王洙得於蠹簡中蓋蠹餘書豈莫錯簡闕誤然微言方略多存於其書則可不徵諸江南諸師秘仲景要方者見千金夫曰玉函曰金匱皆後世美稱已非舊名也故仲景自序曰作傷寒雜病論十六卷未嘗曰作玉函金匱千金亦稱要方都是一書宋時始分爲二書去玉函二字單名金匱要略蓋其雜病論也。今坊間所刻玉函經清陳世傑僞撰以欺夫小子亡識人已彼言理鑿者說迂者一切不取之何不別著一書而論之而作此兩端之說以惑來學哉。

傷寒論大經非病在大經也假以爲紀也已及其施治也皆從證而不拘焉至皆非矣不可從也。

扁鵲曰疾之居腠理也湯熨之所及也在血脈鍼石之所及也其在腸胃

酒醪之所及也。在骨髓。雖司命無奈之何。仲景論傷寒亦猶是已。其序六經之病則不可易也。趙繼宗作邪說。戴思恭有異論。而後及本邦。後藤氏大造畔正之說。設淺深閉脫以變亂之。然其說至合病併病而窮矣。趙嗣真曰。仲景之書一字不同。則治法霄壤。讀者其可不於片言隻字以求其意歟。不達其意者。悖師而惑於所見也已。彼書所論大抵不出于後藤氏之糟粕。實慕商鞅變法。襲李斯故智哉。

後世以病因爲治本也。曰不知之焉得治。予嘗學其道。恍惚不可分。雖聖人難知之已。至雖曰無因亦可。是以吾黨不言因。恐眩因失治矣。後世論因多端。徒以惑人。不可從焉。

醫病求因。治術要領。古之法也。素問曰。治之極於一。一者因得之。又曰。治病必求其本。今以傷寒之一事證之。仲景曰。本太陽病。醫反下之。因而腹滿時痛者。屬太陰也。桂枝加芍藥湯主之。此太陰之見症。而用太陽本病藥。非治因而何也。其它病發於陽而反下之。熱入。因作結胸。本是霍亂。今是傷寒。本虛。本不虛。是本病。及某經傷風。某經傷寒等語。無往而非求因也。彼今舉桂枝湯。柴胡湯。白虎湯。通治之例。而言無求因。何術之粗邪。此所謂醫不執方。合宜而用者。如珠走槃。如槃走珠。無不可者也。在金匱曰。短氣有微飲者。當從小便去之。桂苓朮甘湯主之。腎氣丸亦主之。病盜飲者。當發其汗。大青龍湯主之。小青龍湯亦主之。此所謂貴活法也。不言因者。傷寒論中。雖一二有之。亦精求其意。則不可謂無因也。若夫不求因而

治病必敗之道也。豈可徵幸十一於千萬。以取必敗之禍哉。傳云。皮之不存。毛將安附焉。吁危矣哉。

治有四。汗吐下和是也。其爲法也。隨毒所在。各異處方。用之瞑眩。其毒從去。是仲景之爲也。至甚矣哉。其惑之也。

治法以汗吐下和爲限者。張戴人之糟粕。而後藤氏之唾餘已。仲景之設法也。豈徒四而已哉。有溫經者。有溫裏者。或利小便。或救裏。治中州則曰建。曰理。治厥則爲四逆。爲通脈。攻心胸。有陷胸瀉心之分。或止利。去黃刺者。灸者。與水者。不與者。及內藥於鼻中者。諸禁。汗吐下者。觸類而長之。則何所不有之有乎。其它後世治術。可取法者猶多焉。以四者限之。術亦拙哉。

人性之所好惡不同。稱口腹者爲宜。不稱者爲不宜。古者養精以穀肉果菜。未嘗言禁宜也。至不亦左乎。

古人設禁忌甚嚴矣。傷寒論桂枝湯方後云。禁生冷粘滑肉麪五辛酒酪臭惡等物。又烏梅圓下云。禁生冷滑物臭食等。其餘各方下云。將息及禁忌。內經所論。千金外臺所序。慎房室戒口腹。且聖人鄉黨之教。何言古者未嘗言禁宜也。作此諛言。取容於世。可謂陋矣。

銖兩升斗。古昔所用甚密矣。雖然年世悠久。不可得而悉也。及夫以殺性之藥。作如此小劑。至故不爲也。

度量衡三者。聖人所製。經濟所先。古今沿革。史書可以徵也。豈爲不審耶。

此書舉二而失一。亡乃不可歟。醫若不詳之。則今古方藥分數。何由準之。夫度量衡之原。以秬黍起數。見漢書。本邦之制。大抵從唐朝制。據杜氏通典。度量衡三倍於漢。以本邦今通行者考之。大抵衡三倍於漢。量十倍於漢。度以貨泉大爲一寸。醫當由此準之。出入和劑。以彼準此。依物作證。何不詳之有。李時珍曰。今古異制。古之一兩。今用一錢可也。古之一升。即今二合半也。此亦以明秤量準。漢制者歟。凡古之方藥。劑大而服小。以傷寒外臺千金等。疾差停後服。不必盡劑。或服不盡劑。服一劑盡。病証猶在者。更作服等語。而可知也。故內經曰。能毒者。以厚藥。不能毒者。以薄藥。此劑之輕重。因病爲之也。余有考證。附醫叢中。彼曰殺性之藥。作如此小劑。不經殊甚。不勝捧腹。

產毒之法。方士所習各殊。至若血暈。欲以參芪之劑防之。妄矣。宜審證治也。又妊娠腹帶之法。中華古無之。云云。非常法也。

臨毒之法。醫所當審密看察也。豈可以微習俗乎。產後血暈。必要參著。庸醫所爲。守株刻舟之屬已。產帶之法。雖華人有之。爲初胎設。不聞如此邦產帶習爲常。而其法亦差異。奚囊便方曰。初胎四五箇月前後。用軟絹或帛闊七八寸。自背纏至腹。以針線縫住。如兜肚樣。晝夜不解。倘胎長大。覺胸中有氣急狀。方可線三分或五分。不可滿寸。漸以調之。則肌肉有所束縛。不使胎長極。大便秘於產也。此方不特宜于初胎者。雖懷胎亦可。知非通行者也。吾門亦有產帶法。產後抗法。不贅於此。

初誕之法務去胎毒爲主。如朱蜜茯苓五香等。何毒之遂不用而可。至夫人者與天地參焉。天不裂地不壞。何唯人之異哉。雖草木亦然。以今之藥攻今之病。何畏怖之有。

初生醫法。千金方有拭法。以拭取舌上惡血。甘艸湯吐去心胸中惡汁。朱蜜法定神止驚。其它準繩有黃連湯。活幼方有黃連甘艸拭法。直指方茯苓丸。以枳殼黃連治氣短腹滿。非茯苓爲下胎毒也。豈待辨之。千金朱蜜法。彼謂爲逐毒。非也。五香湯出千金。聖濟總錄御局等癰疽諸瘡之方也。本邦醫俗以爲胎毒之藥。固妄之甚。當辯正而禁之。夫人者與天地參。確乎聖人之言也哉。而彼已以陰陽五行爲外物。此何其言之太相逕庭哉。天地之氣有盛衰。草木有苗而不秀。人生亦有稟賦強弱。是乃所以與天地參耳。彼已作天不裂地不壞之言。不論嬰兒強弱。一切攻擊。又何畏怖之有。豈是仁人之用心哉。

痘疹之證。古籍不概見。東漢初始有之。至始興癰瘍無異矣。治法亦以除毒排膿爲主。如補瀉二法。則不知者之所立耳。蓋見毒酷而死者也。未見毒盡而斃者也。其斃者是酷毒壅塞之所致也。

痘疹治法。大要與癰疽無異者。薛立齋之言也。又曰。宜辨表裏虛實寒熱。蓋表虛而用發表之劑。輕則班爛重則不能起發而死。裏實而用托裏之劑。輕則患痘毒。重則喘息腹脹而死。裏虛而用疎導之劑。輕則難以貫膿結痂。重則不能結膿落膿而死。治法豈可不慎哉。若果除毒一法。爲能治

痘治亦易易哉。可謂古今小方脈。牛刀割雞。長父刈薺。豈其然也哉。況起發。灌膿。結痂。三者皆賴脾胃榮養。何可妄投剋伐之除毒。以招夭枉乎。夫痘疹爲嬰孩保生第一關隘也。術豈可若斯粗哉。魏桂岩順逆險三法。及錢仲陽陳文中之論。雖各有得失。亦後昆所取則。其它博問審尋。不可敢恣。是古者醫學之所以分科習業。貴乎精專也。

醫之於術也。攻而已。無有補矣。藥者一乎攻焉者也。攻擊疾病已。至元氣果可補。則人焉死。妄誕特甚矣。

語曰。一言而可以興邦有諸。一言而喪邦有諸。孔子曰。言不可以若是其幾也。彼吉子者。欲以攻之一言。盡醫之術。妄亦甚矣。夫事物之理。勢二曰。利曰害。而利或生害。害亦生利。凡人身所患。唯邪盛正虛耳。攻之去邪。將大利於人身者也。然圖之不審。害旋隨之。惟攻可攻於可攻之時。則利。攻不可攻於不可攻之時。則害。用舍有宜。張弛異勢。而彼不辨虛盛曰。攻而已。吁。玉石俱焚。良莠同陷。此存亡之樞機。不可不察也。故善醫者。先料內以攻外。不逐末以損本。然後安平可保。大邪可除。今不辨虛盛。惟一於攻。攻罷即敗。不保其勝。恐非疾醫之良算也。如能知邪正利害之際。可攻而攻之。可撫而撫之。庶幾不誤乎興喪安危之數矣。

夫正權衡而後輕重可較也。審平常而後虛實可論也。至又如謂氣虛腎虛脾胃虛之類。亦率準之。皆不因疾命名。愆之所創焉。

以疴羸言虛實者。猶以皮相分賢愚。凡庸之見已。今以羸弱立虛實論。設

羸弱實以證虛實。醫主天稟謂之虛。彼主失常謂之實。不知指物。不能正名。皆非也。又欲實其說。而引內經邪之所湊其氣必虛。若內經言其氣必實。則可也。欲證實而反引虛。實不知而謬然。醫不知而默然。彼亦不知而妄言。豈可不笑哉。以氣虛腎虛。脾胃虛。爲愆之所創焉。以余觀之。猶作環舞者。宮室皆轉。瞰回旋者。頭目自拖。非宮室之幻惑也。人自惑之。非回旋之改變。而人自變之。彼以攻一言。斷醫之道。主見證而希速効。終乃畔理傷道。猶硜硜然欲果於行。危矣哉。聖人言曰。無欲速。無見小利。欲速則不達。見小利則大事不成。信也哉。此言學者可不慎焉矣夫。

題斥醫斷後

近世香川子。首倡儒中之醫。傲然曰。自我作古。則廢古來醫說。以解其拘牽。排擊世醫。以破其盲瞶也。直截痛快。莫甚於此云。世醫小有才之輩。遽喜其新奇。妄謂千古不傳之祕者。殊不知議論之激。矯而過正。好奇之甚。稍涉偏僻。其究弗使庸醫恣而自用其意。妄而輕試其毒者幾希。嗟呼。流弊之至。賊夫人之子者。不亦悲哉。頃吉益氏門人鶴生作醫斷。則全然香子之說。剿以爲己有。稍換其字。或微變其意。左支右吾。敷衍成篇。其他一二異見。飾以師說。而務立其門戶。以稱卓然自信者。亦唯殺機之存心。不覺口自出。乃至曰。死生者醫之所不與而極也。其少恩而慘礫。雖香子之勇哉。殆足以寒其膽者也。則儒中之醫。於是乎終臻其極矣。此雖其人奇癖乃爾。細究其病根。則香子之藥無乃瞶眩乎。不則長沙之靈爲之祟者非耶。何其慘毒。嗚呼。儒中之醫而有斯弊。不亦怪乎。吉子之才而墜其唾餘。何其不悟。而况鶴氏之子。白面醫生。學而未試。其藥不售。終日兀坐。與書爲仇。剽襲剽竊。弄筆遣悶。亦其中不能自信。特大言欺人耳。此輩鹵莽。何足論哉。予嘗作斯論。以評一子者久之。雖然。辨之不得已。持斲逼人。頗闕遜讓之義云。則未嘗舉而語之人也。吾友新甫子好學之醫也。其術大行于世。而行餘之文。亦不堪技癢。著書以見示。則斥醫斷也。力排吉子。攻擊之殷。不遺餘力。因又命予跋。以請犄角之援云。不亦甚哉。順也。怯懦。豈

奮於掎角者乎。無已則曩者之論歟。雖一矢加遺哉。強弩之末。何援之有。新甫子則扼腕曰。吾子偏師攻香子。吾全軍擊吉子乎。掎角之勢。莫熾於此云爾。則亦何其狂。且近於戲謔也。不覺相視大咲。尙且左手捧腹。右手揮毫。因書之卷末。亦豈跋云乎哉。聊與新甫子相戲而已。吁甚矣吾黨之狂也。報顏投筆而走云。寶曆壬午春三月。

平安醫士法眼武川幸順撰